

Harapan Matahari Terbit di Indonesia

Pada awal bulan Oktober perhatian dunia tertumpu ke Indoensia kerana Leftenan Kernel Untung telah mengetuai suatu rampasan kuasa yang dinamakan “Rampasan Kuasa 30 September” dari pemerintah di Indonesia dengan melakukan pembunuhan-pembunuhan kepada enam orang jeneral dan banyak lagi yang lain-lainnya. Di antara orang yang terlepas daripada maut itu ialah Jeneral Suharto yang kebetulan melawat anaknya di rumah sakit dan Jeneral Nasution, Menteri Pertahanan Indonesia yang dapat melepaskan diri dengan melompat pagar masuk ke kawasan rumah kedutaan Iraq, sedang *President* Sukarno sendiri sekalipun beberapa hari tidak didengar beritanya dengan sah tetapi rupanya telah “selamat” daripada penganas-penganas 30 September yang merampas kuasa itu.

Nasib baik beberapa hari kemudian keadaan di Jakarta dapat dipulihkan dan rebutan kuasa itu dapat dipatahkan dan akhir-akhirnya penyelidikan didapati bahawa tulang belakang daripada rebut kuasa ini ialah orang-orang Komunis yang diketuai oleh D. N. Aidit dan tidak kurang pula didapati bahawa kerajaan China Komunis adalah menyokong dan menjadi tulang belakang daripada peristiwa rebut kuasa ini untuk mendirikan sebuah kerajaan Komunis di Indonesia.

Semenjak daripada perpecahan umat Islam yang kuat di Indonesia di bawah bendera Masyumi dengan timbulnya Nahdatul Ulama, maka kekuatan-kekuatan umat Islam yang besar itu telah menjadi lemah apabila Sukarno dapat menggunakan Nahdatul Ulama untuk meruntuhkan Masyumi dan di sampingnya dapat pula meruntuhkan Parti *Socialist* Indonesia di bawah ketuanya Sutan Sjahrir.

Kedudukan Masyumi semasa itu semakin lemah apabila sentiasa menggunakan dasar berdamai dengan parti-parti lain bagi menujuhkan kerajaan dan tersangat lurus dalam pelaksanaan negara akhirnya membawa kegagalan-kegagalan di dalam tiap-tiap langkahnya. Orang-orang Masyumi tidak cergas mengambil langkah dan sangat “dingin” di dalam melaksanakan perjuangan

serta kurang tegas bertindak. Mereka sangat banyak berfikir daripada bergerak sehingga pada saat Ketua Staf Angkatan Darat Leftenan-leftenan Kolonel Zulkifli Lubis meminta Masyumi mempersetujui melangkah untuk menculik dan menyingkirkan Sukarno serta merebut kekuasaan di Indonesia, Masyumi ragu-ragu sehingga peluang yang baik itu terlepas dan Sukarno dapat terus berkuasa.

Keadaan di Indonesia semakin tidak menyenangkan. Dasar Sukarno dijalankan supaya tetap berkuasa ialah membawa dasar British – pecah-pecahan dan perintah. Ia dari saat itu mula memberi muka kepada Komunis dan mulai mengadakan penindasan-penindasan terhadap pemimpin-pemimpin Islam terutamanya Masyumi dan Parti *Socialist*. Melihat tentangan-tentangan Sukarno yang jelas ini adalah menimbulkan suatu gerak pemberontakan di Sumatera yang disertai oleh pemimpin *Socialist* dan Masyumi sendiri kerana tidak cukup kompak kerana berlainan ideologi keduanya – tiap-tiap langkah yang dijalankan tidak dengan muafakat dan berunding sebagaimana yang dinyatakan oleh Mohammad Natsir Ketua Masyumi, itulah yang menjadi sebab pemberontakan itu gagal.

Tentunya Sukarno memandang bahawa inilah saatnya bagi

meruntuhkan musuh-musuhnya dan kerana itu tidak lama kemudiannya Parti *Socialist* dan Masyumi diharamkan dan ia mengutamakan Komunis dan cuba menyatukan tiga aliran parti menjadi satu di dalam satu lingkungan Nasional-Islam-Komunis yang dengan ringkasnya disebut NASUKOM¹. Ini bertambah-bertambah lagi menimbulkan galakan Komunis di Indonesia apabila Sukarno memberi mereka terutamanya apabila Sukarno berharapkan bantuan-bantuan dari Komunis China sehingga dengan anjuran Komunis China Indonesia keluar dari menjadi ahli Bangsa-bangsa Bersatu.

Komunis semakin galak dan golongan-golongan ini di sana sini menunjukkan tunjuk-tunjuk perasaan, bencikan Barat dan bencikan semua yang dibencikan oleh Komunis. Di dalam saat itu mereka memasukkan orangnya-orangnya di dalam golongan-golongan tentera dan pada saat-saat yang akhir Komunis menuntut supaya kerajaan meluluskan undang-undang mempersenjatai peladang-peladang sebagai latihan berkawal daripada serangan-serangan yang dinamakan *neo-colonialist* dan penjajah-penjajah Barat. Langkah-langkah ini dapat dilihat daripada berita dari suatu ke suatu masa dan mereka mengadakan susunan-susunan yang rapi untuk bersiap-siap.

Hubungan kerajaan Indonesia dengan kerajaan Komunis semakin rapat. Silih berganti utusan-utusan kedua-dua belah pihak datang-mendatangi dan bantuan-bantuan membangun negara telah diberi oleh kerajaan China dengan luasnya. Tenaga ahli dan barang-barang dihantar ke Indonesia di dalam mana bantuan-bantuan itu mungkin Sukarno sendiri tidak menyedari ada berudang di sebalik batu. Di dalam “barang-barang pemberian” yang dihantarkan oleh negara China itu diseludupkan senjata-senjata ringan; *machine-gun*, bom tangan, bazooka dan lain-lain senjata untuk mempersenjatai orang-orang Komunis.

Mungkin dengan setahu Sukarno latihan-latihan diadakan di tempat-tempat tentera kepada pemuda-pemuda Komunis untuk menggunakan

senjata-senjata tersebut. Mungkin pula di dalam kesiapan-kesiapan itu telah disusun oleh Peking. Ini terbukti apabila kerajaan Peking telah menjemput beratus-beratus jeneral Indonesia untuk menyambut 1 Oktober di Peking tetapi untungnya tidak banyak jeneral-jeneral yang pergi dan sehari sebelum 1 Oktober itu rencana rebut kuasa dimulai di Indonesia dengan senjata-senjata yang didapati dan yang diberi oleh Komunis China kepada Komunis Indonesia.

Adakah hal ini disertai oleh Sukarno dan Subandrio? Ini menjadi suatu pertanyaan yang timbul di mana-mana kerana merebut kuasa itu dikepalai oleh Kolonel Untung yang menjadi Ketua Pengawal Peribadi *President* Sukarno sedang di dalam peristiwa itu Sukarno dan anak-anaknya selamat tetapi anak-anak kecil daripada Jeneral Nasution dan anak-anak dari beberapa panglima telah menjadi korban padahal pengawal peribadi Sukarno tentu setiap saat ada di sisi Sukarno.

Di dalam saat yang terakhir dapat pula dilihat bahawa sekalipun umat dan tentera menghendaki supaya Komunis diharamkan di Indonesia namun Sukarno masih tetap tidak mahu mengisyiharkan pengharaman kepada Komunis. Ini menjadi suatu tanda tanya yang luas mengapa Sukarno tidak mahu mengharamkan Komunis. Adakah Sukarno berfikir bahawa tenaga Komunis diperlukan lagi di Indonesia sedang orang-orang Komunis telah menumpahkan darah pemimpin-pemimpin tentera yang berjasa kepada perkembangan Indonesia? Adakah tentera akan mendiamkan diri dan membiarkan serta menyertai kehendak Sukarno “memelihara” orang-orang Komunis di Indonesia yang di belakangnya berdiri kerajaan Komunis China? Adakah mungkin jeneral-jeneral yang terlepas daripada maut akan menyetujui langkah-langkah Sukarno masih “cintakan” Komunis?

Ini adalah soal-soal yang akan dapat dilihat tidak berapa lama lagi di dalam jawapannya yang menunjukkan adakah

¹ Perkataan sebenar ialah NASAKOM.

diktator Sukarno masih berkuasa di Indonesia.

Nampaknya kuasa Sukarno telah luntur kerana apabila terjadi peristiwa di Semarang baru-baru ini tidak ada seorang tentera yang taat kepada perintah Sukarno untuk menembak penunjuk-penunjuk perasaan yang telah membakar kilang-kilang rokok China di Semarang dan menyerang harta benda orang-orang Cina.

Ini adalah juga menjadi suatu bukti bahawa bintang Sukarno sedang menurun dan adalah diyakinkan sekiranya Sukarno dari satu saat kepada satu saat kekuasaannya makin luntur dan Komunis Indonesia sudah hopus dan tidak mungkin akan ada perang

saudara di Indonesia kerana berebut kekuasaan. Parti-parti selain daripada Komunis dan golongan-golongan Komunis, daripada apa yang dilihat pada masa-masa yang telah lalu masih boleh bekerjasama dan mungkin pihak tentera akan mengemukakan pemimpin-pemimpin yang jujur untuk memimpin negara Indonesia yang kaya raya dengan bahan-bahan yang berharga menuju ke jalan makmur dan kebahagiaan – tidak seperti dalam masa hampir 20 tahun rakyat Indonesia semakin menderita dan semakin susah hidup sedang yang kenyangnya gembung-gembung yang tidak jujur termasuk Sukarno yang gila kebesaran dan gila wanita.



President Sukarno di dalam persidangan akhbar yang pertama sesudah berlaku cubaan Rebut Kuasa 30 September yang gagal itu. Di kanannya Dr. Subandrio yang sekarang diberi tugas di luar negeri kerana rakyat menggesa bahawa Subandrio terlibat di dalam rebut kuasa itu. Nampaknya Sukarno masih sayang kepadanya.